

Blera cumpetenza sot en tetg

Avertura center da cumpetenza biagier ed energia a Savognin

DA PEDER ANTONA BARTERMIA

■ **Sonda e dumengia proxima derva a Savognin/Padnal igl center da cumpetenza per biagier ed energia las sias portas. Quatter partenaris portan igl project dad en center logistic per minergie-P.** Sonda, igls 12 da november dallas 13.00 anfignen las 17.00 e dumengia, igls 13 da november dallas 10.00 allas 16.00 èn las portas avertas tar igl center da cumpetenza tar la halla da produziun dad Uffer AG a Savognin/Padnal. An ena exposiziun suvasibla survignan igls visitaders ena survista cumpetenta an connex cun biagier ed en adiever optimo dad energia. E chest center duess rastar en'adresa da cumpetenza cura tgi persungas digl rom an dumondas da construcziun u ensatgi ò interess da biagier. Aint igl center duess er neir instrua persungas interessadas an chella direcziun.

Quatter pitgas principalas

Sonda e dumengia survignan igls visitaders sen treis plangs infurmaziuns sur dad energia an general ed an connex cun ecologia ed effizienz an spezial. An-

tras manavar sen igl monitor d'en computer (touchscreen) ins sogl neir tar las infurmaziuns e schi el less piglier chellas cun el pò el gist tarmetter en e-mail cun igls documaints giavischias tar el a tgesa. E tiers igls documaints pertutgont l'effizienz d'energia èn er da cattar diversas occurrenz, igl concept da spazi digl center cun las localitads da scolaziun etc.

Chest center da cumpetenza a Savognin è purto da quatter partenaris principals. Chegl è la fundaziun Minergie, las ovras electricas digl martgea da Turitg ewz, la scol'ota digl rom ibW Südostschweiz e la Uffer AG. La ewz dat sen 60 m² infurmaziuns generalas tar l'energia davent dall'ovra hidraulica anfignen cura tgi igl current vign or dalla veschla. Igl cunsiglieders digl ewz vignan a star a disposiziun agls visitaders per tottas dumondas d'energia. La scol'ota digl rom ibW Südostschweiz vign agl avignair a nizigier las localitads da scolaziun per mussar agls students da chellas direcziuns an la practica scu tgi ins so biagier da maniera effizienta an connex cun igl adiever d'energia.

Digl reminent ins ò savia gu-

dagner *Stefan Engler* scu president dalla cuminanza d'interess «biagier ed energia». Scu parsoura dalla conferenza digls directours da construcziun cantunals ò el cò las duevlas cunachientschas ed è er sto ferm vedlonder cura tgi gl'è ia per realisar la lescha d'energia revideida.

Ena reit da profis

Tar la Uffer AG è *James Cristallo* igl responsabel e promotour digl center da cumpetenza «biagier ed energia». Ed igl success da chel center vei el a lunga vista angal cun ena antiera reit da collaboraziun e relaziuns tgi sa basan sen igls pi divers partenaris tgi on da far ensatge cun la cadagna da biagier ed energia. Uscheia seian oz gio 20 partenaris dalla parteida e tar l'avertura mossan els igls divers aspects cura tgi vo ainten la construcziun da bietgs per optimar l'energia. Seia chegl tar bietgs novs e tar la sanaziun da bietgs existents.

Uscheia duess igl center da cumpetenza davantar chel li noua tg'ins s'infurmescha cura tgi vo per l'effizienz d'energia ainten la construcziun da bietgs. En tema actual ple tgi mai.

